

MME ÑKPỌ EKE ENAMDE OWO ODOT NDIDI ÑWAN-NDỌ CHRIST

Matthew 25:1-30; Eriyarare 2:1-4; Mme Ñke 31:10-31

ỌYỌHỌ UKPEP-ÑKPỌ 363

Eke Mkparawa

**IKỌ IBUOT: “Ekpeme ndien: koro mbufo mifiokke usen eke Ọbọñ mbufo edide”
(Matthew 24:42).**

Nte Inọ Ke Okoneyo

“Edi efiok emi, ete, edieke enyene-ufok ọkpofiofokde ini eke inọ edide, enye ekpekpeme” (Matthew 24:43). Edi inọ idinohọ etop ke ini enye ekade ndiyip ñkpọ, edi edieke owo ofiofokde ete ke owo ke edi ndidomo ndibuñ nduk ufok esie okoneyo usen kiet, enye enyene ndikot bodisi edidibe ekpere man ekpemum inọ oro. Ndinam ntem odot. Ndien kpa nte inọ ekemede ndidi ke ini ekededi, nnyin ikpenyene ndikobi usuñ nnyin inyuñ isaña ke item nte akpanade inam. Owo ekpenyene ndifiok nte ke inyene ndidu ke mbeñidem ke abaña se enye ofiofokde ete eyetibe ke ini iso.

Jesus eketiñ ete ke ini ididide itiene Ñwan-ndọ Imọ, Imọ ididi nte inọ ke okoneyo. Kpukpru Iko emi Jesus etiñde edi akpanikọ, kpukpru eyesu. Ntre edieke nnyin inyenede ibuot, nnyin iyedu ke mbeñidem ibet ini oro Jesus edidide ndikot ikot Esie nsio ke ererimbot emi.

Ekeme ndidi ke usen-ubok ke ini utin asiahade ke ererimbot ñkañ nnyin, ndien nnyin emi ikebeñede idem ndisobo ye Jesus iyetonọ obufa usen ke mme Heaven ke enyofñ. Ke ñkañ ererimbot efen, eyedi okoneyo, ini ekade ndiduk idap. Edidi ini mme owo edohode ete “esiere-o” ndien ini kiet mmọ eyedemere ke ubon edidi Jesus, ndien eyedohọ ye mme ndisana owo emi mmọ edisobode do ete “emesiere-o.” Ke ererimbot ñkañ eken, mme owo eyetetie eyom ndidia udia uwemeyo mmọ, ndien mmọ emi ekekpañde uton enọ ikot Jesus eyekpon udia mmọ edok eka udia-ndọ Eyen-erofñ ye Jesus ke mme Heaven. Usen kiet nnyin iyekop mme ikọ emi, “Ekem ini ndọ Eyen-erofñ, Ñwan Esie otim idem ebeñe Enye” (Eriyarare 19:7). Nso utọ usen ke edidi! Edi nnyin inyene ndidu ke mbeñidem mbaña usen oro.

Ndibeñe Idem

Ndibeñe idem ọworo nso? Ndusuk eyedohọ: “Jesus ama anyaña mi osio ke mme idiok-ñkpọ mi. Mmofiofok nte ke ema efen kpukpru idiok-ñkpọ mi. Mmeti ini emi Jesus ekeyetde mi onyuñ anamde mi nsana. Nso utọ ubon ọkoyohọ uwem mi ke ini Jesus onimde mi baptism Edisana Spirit!” Mmọ oro edi mme utibe enọ, ndien edieke nnyin ikade iso ndibon akam, inyuñ ikot ñwed Abasi, inyuñ idu uwem nte Ñwed Abasi ekpepde nnyin ke adaña ini ima ikobọ mme ñkpọ emi, nnyin iyedu ke mbeñidem ke ini Jesus edidide.

Nte afo ke amama kpukpru owo nte emi akamade ke akpa ini emi Jesus anyañade fi? Nte emeti nte mmọ emi afo akasuede akpa ekenyenede fi ukpuhore ke ini Jesus odukde esit fo? Nte emeti adaña nte afo okoyomde mmọ efen ekop ukem idara edinyaña-ukpon emi afo okokopde? Ama esibon akam ye nsin ifik man mmọ efen ekpebo erinyaña, onyuñ anam se ekekeme ndinem mmọ esit ke abaña mme ñkpọ nsinsi ini. Nte ke enyenyene udon oro?

Jesus ama obon akam abaña mbet Esie ete: “Da akpanikọ Fo dianare mmọ nim nọ Idem Fo: Iko Fo edi akpanikọ”; ndien Enye aka iso etiñ ete, “man mmọ kpukpru ekpekam edi kiet, nte Afo, Ete odude Mi ke idem, Ami nnyuñ ndude ke Afo” (John 17:17, 20c, 21). Nte afo emeti nte okokopde emem ke ini Jesus anamde fi asana? Afo ukoyomke ndinọ mfaña. Afo ama okop inem edidiana kiet ke mbuotidem emi otode edinam-asana. Nte ke osuk enyenyene inem oro?

Ke ini ekenimde fi uduok-mmofñ Edisana Spirit ye ikañ, afo ama okop nte esikde ekpere Obon tutu enye etie nte omofñ ọkpofñ ererimbot ini kiet aka Heaven. Eketie fi nte emi Heaven ekpedide ikpat kiet. Nte enye ke ekpekpere ntre? Jesus ama etiñ ete ke Iberedem, kpa Edisana Spirit, eyedi editiñ ñkpọ abaña Imọ. Enye eyetiñ onọ nnyin abaña idara emi ebetde nnyin ke Heaven. Edisana Spirit edi man editiñ ñkpọ onọ nnyin abaña ebiet-iduñ Esie.

Didie ke aka iso enem fi mfin ke ini okopde abaña ebiet emi Jesus akade nditim nnọ fi? Nte ke aka iso nditiñ kpa nte emi etiñde abaña ufok enye emi afo oduñde mi?

Nte nnyin ke iduñ kpukpru usen ye ekikere ite ke nnyin idi Ñwan-ndọ Christ, ndien ke inyene ndidot? Nte imotim ikpeme man okudu ñkpọ ndomokiet ke uwem nnyin emi akpayatde Jesus esit edieke akpanade Enye okot nnyin aka Ndọ mfin? Owo ekeme ndidu eti uwem, enyene ọkpọsọñ udoñ ndinam mmọ efen enim mme Mbet-nti-ido, edi, kpa ye oro inyeneke ima Jesus ke esit esie kpa nte emi enye ekenyenede ke ini ekenyañade enye akpa.

Ndiduok Akpa Ima Oro

Ke ini John, owo Mbet okodude ke Isuo Patmos, ke ñkukut, ema ewut enye nnen-nen nte mme Ufọk-Abasi ke Asia eketiede. Emi edi se Jesus eketiñde ọnọ enye abaña Ufọk-Abasi emi okodude ke Ephesus: “Mmọfiok mme utom fo, ye ọkpọsọñ eñwan ye ime fo; mmonyuñ mfiok nte ukemeke ndibiom mme idiok owo, okonyuñ odomo mmọ emi ekotde idem mme apostle, ndien midighe, okonyuñ ayarade ọfiok ete mmọ edi mme osu-nsu; omonyuñ enyene ime, okonyuñ obiom ukut ke abaña enyiñ Mi, unyuñ ukabakere ukpa mba. Edi mmenyene se ndade mbiom fi, emi ọkọkpọñde akpa ima fo. Mmọdo ti itie emi ọkọduode ọkpọñ, nyuñ kabare esit, nyuñ nam se akanamde ke akpa” (Eriyarare 2:2-5).

Mmọ emi ema etim ebọ erinyaña. Jesus ọkọdọhọ ete, “Ti itie emi ọkọduode” Mmọ ini kiet ko ema enyene ima Abasi ke esit mmọ, edi ema efiak edem. Ema esin ifik enam ñkpọ enọ Jesus, mmọ ekasuk enanam. Mmọ ema enyene ime, enyene ekan ediwak mmọ emi ekotde idem mmọ mme anditiene-Christ. Mmọ ema esin ifik esua idiok-ñkpọ enọ mmọ efen. Mmọ ekekere ete ke se ikanamde, ikanam inọ Jesus. Edi mmọ ema eduok akpa ima oro, ke ntre mmọ ikodotke ndidi Ñwan-ndọ Christ.

Iko etiñ ọnọ nnyin ete ekpedi nnyin inyene mbuotidem emi akpakpatde mme obot efep, edi inana ima Abasi ke esit nnyin, nnyin idighe ñkpọ baba kiet. Nnyin imekeme ndinọ idem nnyin nte uwa, inọ kpukpru okuk nnyin man eda ebok mme ubuene, oro idinamke nnyin idi Ñwan-ndọ Christ. Nnyin inyene ndinyene ima Abasi ke esit nnyin inyuñ isuhọ enye do. “Akan kpukpru ñkpọ, enyene ufiop-ufiop ima ke otu idem mbufo; koro ima ofukde ekese idiok-ñkpọ” (1 Peter 4:8).

Mme Ndisime Nditọ Iban Ndọ

Ke ñke mme asian iban ition ye ndisime iban ition, etiñ enọ nnyin ebaña otu mme okpono Abasi emi kpukpru mmọ ekebetde eridi Ọbọñ. Kpukpru mmọ ema ekere ete imodu ke mbeñidem, edi ition ke otu mmọ ekebiet mbon Ufọk-Abasi Ephesus. Mmọ ema eduok “akpa ima” oro. Mmọ ema enam ñkpọ ukem nte ition eken. Ekenam ukem utom, edi esit mmọ ikedighe ukem. Ini kiet mmọ ema enyene ima Abasi, edi mmọ ema ayak ima oro odut ọwọrọ tutu utuenikañ mmọ akabare edi ukpọk. Idighe kpukpru mmọ emi eketọñde nte nditọ Abasi edidu ke mbeñidem ke ini Jesus edidide. “Eyenyaña owo eke edimede ime tutu osim akpatre” (Matthew 10:22).

Ñwan-ndọ Christ

Didie ndien ke nnyin ikeme ndidu man aran okudut ọwọrọ ke usin-aran nnyin, ndien ayak nnyin ye utuenikañ nnyin ana ukpọk? Ke Mme Ñke 31, etiñ ebaña enyene-ido añwan, enye emi etiede nte Ñwan-ndọ Christ.

“Esit ebe esie ọbuot idem ye enye” (Mme Ñke 31:11). Jesus edi Ebe. Nte Enye ekeme nditim mbuot idem ke afo? Enye iduhe idahemi. Nte esit Esie afina oto nte afo odude uwem ke ini emi Enye miduhe mi? Kpukpru edinam nnyin ekpedi ye ekikere emi: Nte Jesus okpoyom mi nnam emi? Edieke edide owo ke ererimbot ke esese uwem mi, nte enye eyefiok mi nte Ñwan-ndọ Christ? Nte ami mmedi kiet ye Enye ke edu uwem ye ke etop kpa nte ebe ye ñwan ekpedide? “Ñwan oro anam enye eti ñkpọ, idinamke idiok kpukpru usen uwem esie.”

Mfọn Ido

“Enye ada ifiok atat inua esie; ewuhọ ima onyuñ odoro enye ke edeme” (Ufañ 26). Ikafañ ke mme owo esifre ndifon ido! “Ima enyenyene anyan ime, onyuñ ọfon ido” (1 Ñwed Corinth 13:4). Ifonke ido ye ufan ye mmọ emi ekperede enye ikpọñ-ikpọñ, inyuñ idighe ke mme saña-saña ini ikpọñ-ikpọñ. Mfọnido edi ibet ọnọ enye. Enye ọfon ido inyuñ itiehe ikere ibaña. Enye ọfọfon ido ye kpukpru owo, kpa ye idem mmọ emi mmimaha enye. Enye ekeme ñko ndibọñ akam mbaña mmọ eke esinde enye enyin. “Ima inamke inua, ikohokede idem, inamke ido eke midotke.”

“Mbuñwum Spirit edi ima, ye idaresit, ye emem, ye ime, ye mfọn-ido, ye eti ido ye edinam akpanikọ, ye ifure-ifure ido, ye mfara ke idem,” (Ñwed Mbon Galatia 5:22, 23). Onyuñ edi uduak Abasi nte ke nnyin ikpenyene ndiñwum kpukpru utọ mfri oro. Utọ mfri oro ewọrọ eto esit emi ọyọhọde ye ima Abasi.

Ndisańa Nte Odotde

Paul, owo mbet etiń ọnọ nnyin ete: “Esańa nte odotde ikot emi ekekotde mbufo, ke kpukpru nsuk-idem ye ifure-ifure ido, ye anyan ime; eme ime ye kiet eken ke ima; esin ifik eda emem nte uruk ebọp idem edian ọtọ kiet ke Spirit” (Nwede Mbon Ephesus 4:1-3).

Edieke idọhọhọde ite idi mme anditiene-Christ inyene ndiwut oro oto ke uwem eke nnyin idude. Nkoń-nkan udọń ke esit eyen Abasi edi enye ndidu ke mbeńidem ke ini Jesus edidide. Enye ańwana kpukpru usen ndinam nkpọ ọfọń akan man enye enyene kpukpru se idotde. Enye esima ndikot utọ mme ufań nwede emi: “Ekunyuń eyat Edisana Spirit Abasi esit, emi edi ke Enye ke ema efik mbufo idiọńọ ebeńe usen erifak. Esiońo kpukpru ndot-ndot ekikere, ye ifuresit, ye iyaresit, ye utọk ye isuńi efep ke otu mbufo” (Nwede Mbon Ephesus 4:30, 31). Enye ke ebeńe Abasi ańwam imọ ndinam uwem imọ ekem ye ikọ oro. Enye isehe inyuń itińke ibańa mme ido mmọ efen.

“Kuyom mme ndo ke usuń isań uwem

Ekpedi nte okutde mmọ

Ọfọń onyuń odot ndisańa nte nnan

Kam fiọk se idide eti emi otode ke mmọ.”

“Nte mmọ emi Abasi ekemekde, emi Abasi akanamde mmọ esana onyuń amade, eda ndien esit mbọm esine (mme esit emi okopde mbọm), ye mfọń-ido, ye nsuk-idem, ye ifure-ifure ido, ye ime” (Nwede Mbon Colossae 3:12), oro edi mme uduot Nwan-ndọ Christ.

Utom Nwan-Ndọ

Spirit ye nwan-ndọ edọhọ ete, Di” (Eriyarare 22:17). Oro edi mbubehe Nwan-ndọ Christ. Enye ke etiene Spirit okot mme anam-idiọk ete ekabare esit. Enye ke ada “udia esie ke anyan ebiet” (Mme Nke 31:14), ọbọk ukpọń esie ye mme udia Heaven. Enye ikopke inem ke mme nkpọ ererimbot ikan nte edińwamde enye ndibet tutu Jesus, Ebe-ndọ esie edi.

MME MBUME

1. Nso ke nnyin ifiọk ibańa ini emi Jesus edidide?
2. Nso itibe inọ nnyin ke ini etebede nnyin ikpe?
3. Nso ke edinam-asana anam ọnọ nnyin?
4. Jesus ọkọdọhọ ete ke Edisana Spirit editiń nso ọnọ nnyin?
5. Ntem ke mbuqtidem, ye idorenyin ye ima esuk edu; ewe okpon akan?
6. Nso ke Jesus ọkọdọhọ ete ke akwańa ke ufọk-Abasi Ephesus?
7. Nso ke owo-ifiọk oro eketiń abańa mfọńido enyene-ido ańwan?
8. Nso idi mme mbuńwum Spirit?
9. Nso idi mbubehe Nwan-ndọ Christ?